



Iacobus uir in diuinis scripturis eruditus & philosophiæ Aristotelicæ non ignarus fuit. Erat enim ingenio excellenti & singulari eloquentia præditus. Is postea Dominicanorum ordinem ingressus, ob eximias quas habebat uirtutes Colonienſis prouincialis factus est. Eam functionem cum optimè administraret ab Innocentio octauo pontifice, unâ cum Heinrico Inſtitore eiusdem ordinis Theologo, Hæreticæ prauitatis inquisitor constituitur. Itaque à collega adiutus præclarum illud opus contra maleficas mulieres composuit, quod libris tribus distinxit, & Malleum maleficarum inscripsit. Floruit is Colonie in suo conuentu, anno salutis

millesimo quadringentesimo nonagesimo quarto. Trit.